

欽定剿平三省邪匪方略

欽定剿平三省邪匪方略正編卷四十九

丁巳年

九月初一日

丁卯

宜綿奏言查方山坪賊巢遼濶

週圍百有餘里四面峭壁懸巖百祥等所帶官

兵四千餘名係在賊巢東南兩面扼據達州東

鄉要隘其西北一帶則係巴州通江等處雖經

招募鄉勇分卡防堵第路逕紛歧堵截旣屬不

易近又因徐添德王三槐敗竄餘匪由太平折

回擾至通江聲言欲與方山坪合夥是以方山
坪賊匪復分股潛赴巴州通江之毡帽山鷹背
嘴竹筒口等處焚掠計圖接應急須添兵駐守
相機夾攻但現有兵力實不敷圍剿據道員石
作瑞等添募鄉勇有一萬餘人俱願隨同剿賊
臣查賊巢東南兩面尙有萬斛坪陳子山等處
亦係通達州東鄉要路其西北一帶之觀子寨

王家寨等處係通巴州通江要隘遂將此項鄉
勇委令知府朱爾漢候補知州劉清等分路帶
往堵剿並飭富爾賽楊秀將所帶官兵三千名
二併前往以期迅速攻洗其竄聚白巖山賊匪
經舒亮穆克登阿等環攻賊勢窮蹙現又陸續
投出四百餘人

臣

一面飛飭該處糧員通判英

貴妥爲安插並令道員李憲宜叅將烏爾卿額

等馳往籌辦一面知會舒亮等嚴密準備如果

白巖山賊匪尅期藏事

臣

卽就近親赴方山坪

督戰以期次第廓清再

臣

接據明興及總理夔

州糧餉道員承勲稟報楚省剿散餘匪現竄回

巫山縣屬張家嘴玉樹坪等處又奉節縣南岸

金子壩地方亦有賊匪數百人肆行焚掠擾至

李子坳該處係利川萬縣雲陽奉節四縣交界

現在督率該地方文武帶領兵勇分投馳往堵
剿臣復飛飭留防夔州之總兵德齡卽帶原領
官兵六百名馳往剿辦並將臨江市防兵三百
名撤赴夔州協剿奏入

上命軍機大臣傳諭宜綿曰宜綿奏籌剿情形祇係
空言看來宜綿之意竟欲待明亮等剿辦楚匪事
竣帶領大兵到彼協助可謂無能宜綿著傳旨申

飭現在方山坪賊匪復分股潛赴巴州通江之毡
帽山等處又添募鄉勇一萬餘人隨同剿辦而宜
綿前調肅州官兵及四川新兵四千名俱可陸續
到營宜綿等自當督率將弁將自太平折回通江
欲與方山坪合夥之賊設法截剿其方山坪賊匪
久經百祥朱射斗帶兵圍住何以又任分股潛赴
巴州等處可見前次攻圍並未嚴密惟當知愧知

奮上緊剿辦

初三日巳秦承恩奏言楚境竄匪探知官兵巳

到竹山卽由鐵爐壩竄入白河縣之石槽溝欲

向縣城奔竄適房縣竹山續來之賊又有三千

餘人亦歸併石槽溝屯聚窺伺經溫承惠帶領

鄉勇由東路繞赴白河近城一帶以防賊人竄

入豐伸布帶滿兵鄉勇各一千名由竹山趕往

追剿因石槽溝迤北有關廟河山梁可以繞至
漢江南岸八月十四日豐伸布帶領兵勇冒雨
前進意欲搶上山梁迎頭攔截行至半坡轉過
山嘴適賊匪亦搶路上山正與相遇豐伸布恐
兵勇退後賊必從上壓下親自騎馬當先帶同
協領伊克精額興福等率領官兵鄉勇施放鎗
箭奮力齊登賊分兩路來撲我兵亦分投迎擊

自巳至未殺斃賊匪一千餘人賊匪拚命直前
愈積愈多短兵相接適聞山頂鎗礮之聲溫承
惠在途次得信已同各委員帶領鄉勇三千餘
名由後路趕上山梁接應賊匪畏懼奔逃我兵
追趕數里復斃多人因天晚雨大卽將兵勇紮
住山頂豐伸布伊克精額興福防禦善福均身
受鎗矛重傷旋即身故兵勇均有傷亡賊匪因

東路已被堵截隨向西鼠赴朱家河該處路近
洵陽可通興安亦可由沿江小路繞至白河

臣

先已派撥兵勇在洵陽之七里關白河之冷水
河等處扼險攔截並親身督率鄉勇在安康接
壤各要隘防堵再行相機進剿復據溫承惠稟
稱探得賊匪由朱家河移屯蔓營地方十七日
夜雨止微有月色該道將所帶兵勇分爲兩路

令葭州知州宋昌瑋縣丞謝國楨帶同於蔓營
小坡埋伏該道督同定邊縣知縣汪玉衡等由
大路直壓賊營十八日黎明賊匪正在造飯出
其不意兩路齊進鎗礮並發擊斃三十餘人賊
匪立時潰亂我兵奮勇衝殺殲斃一百八十餘
人生擒賊匪十一名婦女十六名賊匪俱向倉
上一帶奔竄訊據賊供該匪因東路已有準備

欲從朱家河西竄洵陽鎮安等語現在探明賊蹤再行進剿等情

臣

以該道兵力尙單已飛飭

叅將富靈保等帶領兵勇就近取道馳赴溫承惠一路會合兜剿再查洵陽白河濱臨漢江所有船隻已分派妥幹員弁盡數收歸北岸並令多帶丁役晝夜梭織巡查其支河港汊小船及停泊江岸空船概行鑿沉俟事竣查明補給修

買一面札飭湖北鄖西鄖陽地方官一體防堵
惟洵陽東北之鎮安山陽商州商南等處並無
一兵適宜綿所調肅州兵一千名行抵西安

臣

已札飭倭什布傳知領兵官由南山小路趕赴
洵陽捍衛東北一帶至興安府城及平利地方

臣

惟多募鄉勇朝夕訓練分布防守至川省賊

匪竄入西鄉白陽關一帶亦經飛調迤東各卡

兵勇前往堵禦並聞惠齡等於八月初一日已抵太平今逾半月自可趕上賊匪痛加剿殺矣同日明亮德楞泰奏言查賊匪前在茨河經官兵趕剿至花石嶺賊自穀城由花石街等處向均州竄逸臣等思均州濱臨漢江設賊匪繞赴仍可竄渡北岸遂飛飭前次派守穀城之副將劉廷基等帶兵一千五百名星夜由江岸就近

馳赴均州臣等由化石嶺繞道進發馳至管驛

地方賊人懼官兵少截紮住山頭施放鎗礮併

力抗拒并於山後林內多設埋伏臣明亮興肇

率領巴圖魯侍衛阿那保副將札勒杭阿等搶

上迤北一帶山梁臣德楞泰同木騰額率領巴

圖魯侍衛溫春副將德寧等搶上迤南一帶山

梁合達音泰侍衛鄂爾綏等率領屯土官兵在

山腰林內設伏長春率領步隊兵丁自下上攻誘賊下山以便上下夾擊復令惠倫阿哈保等帶馬隊兵丁俟山腰達音泰一路伏兵起時卽直前衝殺以期分開賊勢使之應接不暇

臣

等

率兵紮住南北山梁鎗礮並發賊人正在抗拒長春率步兵自下上撲賊自上施放連環飛擲石塊長春佯率兵丁稍退該匪吶喊搖旗壓下

臣等兩路並進兜出賊人之後併力壓剿長春
率兵轉身迎擊將近山腰達音泰又突率伏兵
從林內出剿惠倫阿哈保亦率馬隊衝出分投
攪殺自未至申斃賊四五百名生擒五十七名
賊匪欲奪路奔逃俱被官兵截住詎山後伏賊
抄出應援賊人乘間奔突越坎踰溝亡命四竄
官兵分投追擊二十餘里殺賊無數天晚雨作

官兵在窑子鋪駐劄次日天雨未止探知賊人
分一股進擾均州一股在丁家營一帶屯聚

臣

等竊計天雨路濘正可攻其不備且將此股賊
衆剷除並可斷進擾州治賊人後路當卽鼓勵
兵丁冒雨前進將至丁家營賊人望見不敢接
仗卽行竄走官兵奮勇趕上追殺四五十名生
擒十二名緣雨勢較大鎗礮不能應手賊人由

草店子奔向孫家灣其進擾均州之賊經劉廷基等率兵迎擊不能搶渡仍行敗回亦抄向孫

家灣一路屯聚

臣

等恐其向西南竹山竹谿一

帶逃竄一面仍派劉廷基等帶領官兵在漢江

北岸探聽賊蹤相地堵截

臣

等惟有奮力兜擊

將賊匪逼向山內悉數剿除至各路要隘

臣

等

隨時酌分兵丁防堵其不關緊要處所隨即撤

調來營進剿並不敢零星派撥致分兵力再撒
拉爾回兵打仗殺賊甚屬出力惟該回民未經
內地暑熱染患痢疫病故者甚多其頭人四品
土司韓光祖於閏六月初間亦患痢疾力疾從
征毫不退却二十八日行至巴東地方因病身
故該土司以邊徼夷民急公効命茲因水土不
服病歿行間可否量加優卹之處出自

皇上天恩

同日觀成劉君輔奏言老木園賊匪臣等自箚

林口進攻奪據後山要卡正在急圖掃蕩乃自

八月初四五日至十二日秋雨連綿泥深路滑

至十三日天色稍霽正在佈置進剿詎賊匪於

十四日丑刻率衆分三路下山每路約二三百

人於深溪口冉家溝野竹溪等處分路直撲官

兵營卡

臣

等派遊擊楊洪新佐領順德等帶領

兵勇分投夾剿其衝撲深溪口一路之賊經都

司馮培元等率領兵勇奮力撲殺當將前隊賊

匪四十餘人盡行殲斃後隊之賊卽行折回其

衝撲冉家溝野竹溪兩股之賊經守備劉順等

督率守卡兵勇扣定連環以待兩路賊匪呼哨

而至我兵互相接應鎗箭並發擊死賊匪五十

餘人兵勇三路追上山坡詎有賊匪從樹林內
突出捨死格鬪我兵人人奮勇又擊斃賊匪一

百餘人餘匪奔上山頂

臣

等催令兵勇乘勢追

撲賊匪推放撞石把總郭常泰外委楊成元均

受石傷兵勇亦有傷亡當卽撤退仍令各卡兵

勇加緊嚴密守禦次日巳刻賊匪復率醜類五

六百人直撲陰晴山附近之義首文生饒明楚

卡座當經徐昭德就近帶領守備楊廷弼並千把兵勇等馳往援應分投截剿相持一時之久斃賊三十餘人兵勇儘力趕殺賊匪仍卽退回再查黑樓門新起之賊攻撲寶塔營盤屯聚沙坪大壩經臣劉君輔帶兵截殺復經惠齡等迎頭夾擊餘匪已遠竄雲開太平一帶近聞惠齡等業已帶兵圍住並未竄入竹山竹谿現在大

寧境內民情漸已寧帖至馬瑀於七月十二日

馳赴巴東臣等續奉不必再派馬瑀前往

諭旨遵卽飭令帶兵轉回於青莊坪寶塔往來堵禦

臣又查齊王氏姚之富股匪已竄赴當陽一帶

明亮等早已帶兵順流而下抄截賊前八月十

二日據巫山縣稟報忽有從巴東折回賊匪四

五百人竄入巫山所屬之玉樹坪地方焚掠經

都司徐朝綱帶領兵勇千名追剿該匪等復竄

至羊耳山經宜綿派令總兵德齡帶兵六百名

前往剿辦臣等查羊耳山與大寧接界該匪被

剿情急勢必圖與老木園賊匪合夥臣等所帶

官兵除分佈各卡隘圍堵及節次傷亡外現在

兵力難於抽撥臣等當卽札知馬瑀就近探聽

賊蹤酌帶官兵馳往奉節大寧交界相機堵剿

臣等惟有速將老木園首夥賊匪趕緊剿淨卽令馬瑀馳赴明亮等軍營協剿

同日景安奏言據各屬稟報吉林各起官兵經帶兵大員嚴加管束在途甚屬安靜茲賽冲阿帶領吉林頭起官兵二百五十餘名於二十二日到襄後起官兵約計月底月初亦可陸續抵襄至蒙

恩賞察哈爾馬八千匹計九月中旬方可抵襄前奉
諭旨令將此項馬匹撥發楚省五千匹其餘三千匹
留於豫省備用並臨時酌量多寡分撥應用

臣現

在核計以五千匹分給吉林索倫官兵尙不敷
用擬於留豫之三千匹內再撥一千五百匹添
補放給所餘馬匹飭交楚省地方官隨營押帶
妥爲喂養以資吉林索倫兵及明亮德楞泰與

臣等軍營拙換之用其餘一千五百匹於南陽
喂養備用均奏入

上命軍機大臣傳諭宜綽明亮德楞泰恒瑞景安秦
承恩曰秦承恩奏賊匪由竹山竹谿竄至白河交
界地方豐伸布等因兵力單弱致被賊衆圍攻受
傷陣亡殊爲可惜豐伸布伊克精額興福善福俱
著各部照陣亡例加一等議卹豐伸布如有子嗣

俟百日後帶領引見現在陝省兵力無多雖有鄉勇一二萬人總須大員帶領官兵在前衝擊方能得力昨據宜綿奏惠齡等追剿竄匪已近陝境該處帶兵大員有惠齡恒瑞慶成等多人莫若令恒瑞酌帶兵二三千就近馳赴白河洵陽一帶秦承恩現住興安亦當帶領本地兵勇星赴該處與恒瑞併力迎擊一面扼其北竄漢江之路一面防護

白河洵陽縣治倘兵力不敷於川省新調甘肅兵
丁過陝時再留一二千名應用亦無不可其陣亡
協領各缺卽著恒瑞於軍營打仗出力各員內揀
員奏補亦可以示鼓勵此次竄入洵陽白河之賊
卽係明亮德楞泰所追之賊不能預爲調度截其
西竄之路仍屬尾追落後伊二人在彼所辦何事
現在前股竄匪已至白河洵陽而後股竄匪仍在

均州明亮德楞泰二人內應酌分一人速帶新到
勁兵迅赴陝境幫同恒瑞秦承恩分投堵剿至豐
伸布等冒雨搶上關廟河山梁率領兵勇迎擊而
溫承惠所帶鄉勇五千由後路趕上山梁接應賊
匪畏懼奔逃迨豐伸布等均受傷身故溫承惠復
於雨夜出賊不意兩路齊進殲斃多賊尙爲出力
可嘉溫承惠著賞給按察使銜並賞戴花翎以示

鼓勵其陣亡兵勇等俱著秦承恩查明咨部恩卹
但豐伸布等在山梁剿賊時溫承惠聞信帶勇到
彼與豐伸布等自必同在一處若豐伸布等被賊
圍住溫承惠不卽帶勇衝殺救援以致豐伸布等
受傷身故則是溫承惠不惟不當加賞並應治以
觀望不救之罪如豐伸布等先被賊圍已受重傷
而溫承惠帶勇到彼奮力解圍擊退賊匪自當加

之獎勵其功罪不可稍有混淆著恒瑞會同秦承恩秉公確查據實具奏至川省賊匪竄入西鄉白陽關一帶惠齡等於八月初一日已抵太平將及兩旬此時何尙不能趕上賊匪以致竄入西鄉著交宜綿查明叅奏並將惠齡恒瑞慶成傳旨嚴行申飭又據景安奏官兵馬匹行走情形前已屢經降旨將先到之吉林黑龍江兵撥赴明亮軍營其

察哈爾馬匹亦令隨兵赴楚以資騎用此時賊匪
距襄陽已遠景安在彼並無緊要之事一俟前項
各兵到齊著景安與愛星阿帶往以爲明亮等聲
援其襄陽郡城著王文雄在彼駐劄足資彈壓至
觀成等此次所奏空言無益著傳旨申飭其追撲
賊匪致被石傷之把總郭常泰外委楊成元及傷
亡兵勇著查明咨部賞卹

上諭內閣曰撒拉爾回子土司韓光祖隨營剿賊奮
勇出力因水土不服病歿行間深爲憫惜著加恩
照傷亡例從優議卹其隨征病故回兵並著查明
人數加倍給賞以示矜卹

初六日壬申宜綿奏言前據百祥朱射斗稟稱方

山坪賊巢四面峭壁必須厚集兵力先將蓋頂
坪多福山兩處山梁奪據庶可進攻隨添派兵

勇萬餘分布堵剿

臣

卽帶領總兵索費英阿藩

司楊揆等馳赴該處週歷各營卡察看蓋頂坪

多福山兩處固係進兵要路而毡帽山一處地

勢最高若據該處山梁迤邐而下更易得手

臣

密派知州劉清帶領鄉勇協同百祥攻打多福

山知州常發祥帶領鄉勇協同朱射斗攻打蓋

頂坪另派原任總兵楊秀副將雷仁等挑選精

銳兵勇由王家寨直取毡帽山總兵富爾賽督
率遊擊花良阿等帶領鄉勇從土地堡撲剿深
溪子索費英阿督率遊擊張應魁等帶領兵勇
從張家廊撲剿鮓魚洞道員石作瑞督率知府
李杭等帶領鄉勇從池溪寺撲剿羊子洞知府
朱爾漢督率知縣席世綱等帶領鄉勇從關廟
子撲剿馬渡關俱令同時並進使賊匪首尾不

能兼顧臣督率員弁帶領兵勇駐紮木梯巖以

爲各路策應十九日百祥率領叅將增順等劉

清率領把總羅君彩等進攻多福山賊匪率衆

出敵勢頗兇猛外委王寶義首王仕貴首先衝

擊倭中鎗傷陣亡我兵不避鎗石併力直上將

多福山賊卡奪據維時朱射斗率領叅將王清

弼等知州常發祥率領州判苑體會等攻擊蓋

頂坪賊卡正在相持喫緊之際賊匪遙見多福山已被官兵佔據漸形慌亂朱射斗常發祥等鼓勵兵勇一擁而上並將蓋頂坪奪據是日楊秀等率兵勇攻打毡帽山賊卡匪衆以該處爲方山坪賊巢要隘防禦甚嚴把總王仕賢外委楊俊秀俱奮勇殺賊陣亡至二十日卯刻楊秀等仍由正路進攻密派知縣呂朝恩教諭高汝

率帶領鄉勇另覓小路繞赴賊寨後面攀援而登直至山頂由上壓下兩路攻擊賊匪潰敗被我兵殲戮殆盡亦卽佔據毡帽山其深溪子鮮魚洞羊子洞馬渡關等處賊卡均經富爾賽等於十九二十等日奮勇攻克各路殲戮賊匪約五六百人至八九百人不等奪獲賊卡十三座刀矛器械一千數百件糧食牛馬甚多餘匪

奔上方山坪二十一日黎明各路兵勇一齊進
攻賊匪恃其險要抵死抗拒我兵連撲數次俱
因滾木插石打下不能徑上自卯至未愈攻愈
力楊秀率領兵勇由毡帽山直據方山坪後山
拋擲火彈燒燬鷲平寺賊巢匪衆慌怯各路兵
勇一擁直上分投殺入賊匪紛紛敗逃我兵悉
力砍殺殲戮五十餘人滾巖落澗者不可勝計

割獻首級二百五十一顆生擒三十四名奪獲
礮位鳥鎗刀矛二百數十件餘匪俱向巴州所
屬之邱家堡沙溪坳等處奔潰我兵陣亡把總
胡鳳韜張祿外委李涵義首吏目職銜何擴茂
其連日傷亡兵勇容俟查明另行咨部查方山
坪西北一帶均係崇山僻徑徐添德王三槐等
尙在通江巴州境內屯紮羅其清冉文儔等此

次捨命奔逃潛向通巴一路或冀與徐添德等
合夥自應乘其喘息未定之時設法追剿

臣現

在一面酌派將弁帶兵趕往通巴一帶督同各
隘口鄉勇竭力堵禦防其西竄一面分派百祥
朱射斗富爾賽等星夜嚴追並恐賊情狡獪多
分股數牽制大兵又廣飭各義首等裹帶口糧
分投搜捕令其各自爲戰總期早擒首逆綏靖

地方所有此次剿賊奮勇之文武員弁及節次
各路打仗出力者謹一併開單恭呈

御覽

宜綿又奏言

臣

接秦承恩知會湖北竹谿竄匪

擾近白河洵陽邊境

臣

查興安各屬留防兵力

無多所有前次檄調甘省督標提標及肅州鎮
標官兵二千名曾經知會秦承恩如果陝省邊

界有須兵力之處卽行酌量截留茲據報稱前
項官兵已行抵興漢一帶正可藉資堵剿惟帶
兵打仗必須大員統率

臣

思柯藩係固原提督

陝甘兩省官兵卽係該提督所轄

臣

已飛咨該

提督卽帶原領固原兵五百名由太平就近趕
赴興安會同籌剿其太平縣地方遼瀾防兵亦
屬不敷已飭原任總兵楊秀率領山西兵五百

名星速馳赴協同碩雲保防堵再前據明興及
道員承勲報稱竄至巫山賊匪經都司徐朝綱
等奮力堵剿賊復繞赴板垭麻子鋪一帶焚掠
委員經歷徐大椿吏目鄧昂率領鄉勇由石馬
河一路迎擊行至鐵瓦寺山梁正遇賊匪該員
等鼓勵鄉勇剿殺賊匪二十餘人嗣因賊衆漫
山掩壓將我兵截作兩處互相圍裹賊匪擲石

亂投徐大椿鄧昂俱受石傷鄉勇亦有損傷又據總兵德齡稟報八月十六日黎明帶兵進攻前隊遊擊趙大用行至羊耳山猝遇賊匪我兵施放鎗礮擊斃賊匪數十名因衆寡不敵趙大用奮勇殺賊陣亡適續調河州官兵五百各到營卽飭令二等待衛伊里布管帶並飭荊州協領喜格將留防開縣滿兵五百名一併星速趕

往幫同德齡設法剿洗

同日額勒登保福寧奏言賊匪林之華覃加耀等被官兵圍逼在帽子山城口子日來屢經衝突營卡均爲我兵鎗石擊退二十一日見賊匪往來山嶺情甚慌遽必係妄思逃竄_臣等二面傳知各路鎮將嚴堵並飭令一聞_臣等督兵上山亦卽相機進擊且因懷抱窩一路昨經兵勇

等兩次潛上擊殺賊人已形畏懼隨於附近營
卡抽調兵七八百名卽乘是夜四鼓微雨之時
督同豐紳薩克坦布等分作兩股攻搶懷抱窩
山梁賊匪知覺始猶滾放木石官兵不避艱險
奮力直上天甫黎明已搶上山頂橫衝直擊遂
將賊卡焚燒殺賊一百餘人生擒二十餘人我
兵正在分路上擊注意首逆乃賊匪在各山梁

吹角叫喊攢集而來與官兵迎拒勢甚猖獗

臣

等已帶兵佔住山包鎗箭齊發賊匪抵敵不住

隨即潰散滾山而下

臣

等一面分兵追擊下山

之賊一面卽上攻帽子山賊匪於山頂擲石并

聚衆趕下抗拒我兵分路夾擊賊又滾山四竄

臣等見賊已奔竄下山急欲追趕雨霧忽大賊

匪卽乘間分爲數股直衝蜈蚣山一碗水中溪

各營卡弁兵施放鎗礮繼以石塊賊匪不能辨
認自相衝殺橫屍遍地守備李成千總朱升鑑
把總胡金柱楊成元張瑛各受傷陣亡兵丁死
傷亦多維時綸布春關騰等俱就近追殺慶溥
卽帶許文謨等趕由黃柏山四方臺一路堵截
臣等將所帶之兵分出臣福寧卽在帽子山城
口子搜剿並商調張廷彥帶兵從雙龍寺滋邱

一路堵截臣額勒登保恐賊匪由石版頭高嶺

頭等處竄出卽帶薩克坦布等繞道由大合山

一路撤帶富森布富蘭之兵於二十三日早間

追至燕子巖見賊匪自紙坊頭溝內正上燕子

巖官兵迎頭截剿死者甚衆賊又竄下溝中當

留官兵在燕子巖要隘截堵臣額勒登保率兵

於二十四日繞至王家坪長巖屋一帶遇賊焚

燒民房隨督兵奮擊左攔右截殲賊更多迫天色昏黑暫於王家坪存駐二十五日追賊至高嶺頭我兵正與打仗賊匪一面迎拒一面多有

下清灘跣水過河者

臣

額勒登保隨留富森布

率兵打仗仍折回王家坪於毛坪上游趕放船

隻連夜渡河抄截擊殺二十六日早間殺賊一

百餘人賊又分三四股奔竄

臣

所帶兵不過四

五百名不能窮追暫於天花坪劄營是日綸布
春慶溥關騰均已趕到沿途殺賊約計七百餘
名並拏獲活賊三十餘名訊供林之華與覃加
耀在帽子山城口子時尙有男婦六千餘人此
次被官兵剿殺不知尙剩多少聞林之華於二
十四日已過清灘河與覃加耀商量要往馬福
營山內藏躲等語

臣

福寧在帽子山城口各山

頂山溝搜剿男婦一百餘人並將軍糧軍火催
趨接濟暫留成德在彼防範二十七日亦已帶

兵趕至天花坪與

臣

額勒登保會合此次先後

殺賊及滾山落水者統計有二千餘名但林之

華覃加耀尙在兔脫已派副將張持等帶兵一

千名由招徠一路到巴東縣堵截關騰烏爾呼

諾帶兵一千餘名於土地嶺隘石窖一路堵截

張廷彥及叅將張順等帶領兵勇二千名從小
峯垭直趨榔坪截剿臣等帶同綸布春及各將
領督兵自牛駝背黃楊坡等處趕殺如此分路
兜剿當可一鼓蕩事均奏入

上命軍機大臣傳諭宜綿額勒登保恒瑞秦承恩柯
藩曰宜綿奏官兵攻克方山坪賊巢之摺初閱似
已辦理得手及閱至首逆俱向通巴一路奔逸仍

未就獲所奏多係空言殊不滿意方山坪賊巢官兵圍剿多日今於首逆逃遁之後得此空寨何足言功卽所奏奪獲卡座多處殲戮賊匪多人恐亦粉飾鋪張以掩其圍堵不嚴之咎難以憑信且此次打仗陣亡弁員義首多人兵勇亦有傷亡徒損兵力尤屬不值宜綿著傳旨嚴行申飭此時賊首既向通巴一路奔逸思與徐添德等合夥宜綿惟

當緊躡賊蹤設法圍擒勿令再與徐添德等會合
以致辦理費手單開保奏各員內楊秀曾任總兵
因獲咎革職此次尙知愧奮且代柯藩在太平一
路帶兵防守著加恩賞給叅將職銜如果始終奮
勉遇有相當之缺再請補用其餘各員著於徐添
德王三槐冉文儔羅其清等各首逆全數擒獲後
再行奏請卽德齡一路雖畧有斬獲而官兵竟有

受傷陣亡者看來亦未得手現在宜綿派令侍衛
伊里布等帶領多兵趕往幫剿著卽飭該員等奮
力截擊不可再令他竄又據奏派令柯藩帶兵趕
赴興安會剿竹谿竄匪一節所辦尙是昨已有旨
令恒瑞帶兵往剿今柯藩又已前往務當會同秦
承恩上緊截剿一面扼住北竄漢江之路一面保
護白河洵陽縣治不可不倍加奮勉也所有巫山

陣亡遊擊趙大用方山坪打仗陣亡之把總王仕
賢胡鳳韜張祿外委王寶楊俊秀李涵義首吏目
職銜何擴茂義首王仕貴均著咨部加等優卹至
屯土兵丁隨征日久此次攻剿方山坪賊匪連日
打仗甚爲勤苦著加恩賞給一月錢糧其餘官兵
如有超衆奮勇者並著宜綿查明請旨加賞以示
鼓勵至額勒登保等見賊匪在山嶺往來恐其衝

撲逃竄遂於四鼓督兵分路前進追搶上山頂賊
匪已早經潰散且賊匪乘霧雨之中尙敢分爲數
股衝我營卡雖屢經剿散而賊勢仍尙猖獗是額
勒登保等名爲攻破帽子山城口子兩處實不過
因賊去後佔據空山而首逆在逃賊匪四竄轉須
處處派兵堵截又致百姓遭其蹂躪實堪憤懣前
因額勒登保帶兵奮勇是以格外加恩晉封侯爵

賞戴雙眼花翎乃辦理此股賊匪曠延多日仍令
首逆逃竄且殺賊尤少更宜綿之不若試思此股
賊匪前由滋邱黃柏山芭葉山等處屢經逃竄額
勒登保等已不能辭堵禦不嚴之咎今賊匪困守
空山爲數不過三四千人額勒登保等帶兵八九
千名以一倍有餘之師攻敗竄窮蹙之賊困守多
時仍令逃竄現在賊首林之華已過清灘河與覃

加耀在紙坊頭藏匿其餘分竄賊匪經額勒登保等分派鎮將等各路堵截賊匪無從逃逸自必仍思竄聚額勒登保等務當自知愧奮迅將賊首擒獲並將餘匪掃除尙可稍贖前愆勉之望之所有此次陣亡守備李成千總朱升鑑把總胡金柱楊成元張瑛俱著咨部加等優卹

初八日
甲戌汪新奏言
臣前因各兵來楚需糧甚

繁聞川省夔府尙多積米客商宜綿繙撥米三萬石現已運到三千石嗣經湖北撫臣姜晟於附近處所碾動倉穀接濟

臣

又飭赴南省採買

米十萬石以備軍儲已敷支給此次被賊地方

難民亦已督飭各州縣實力查辦民情俱極寧

帖日內均州賊匪經明亮德楞額率帶兵剿辦已

向均鄖交界地方奔竄距襄四百餘里

臣

抵襄

以來已嚴催沿途各站將糧餉軍火源源滾運
至前股分竄入房縣二竹之賊查房縣巡檢黃
詔在竹山交界上龕地方督同鄉勇斃賊一百
二十餘名生擒譚世倫等十名該處鄉勇亦損
傷三十餘人又賊匪在竹谿之漫液溝焚掠有
閩家寨生員甯符祥李嗣璉孟學詩等糾約鄉
勇合力堵禦殺賊甚多鄉勇亦間有傷亡又賊

匪竄至施甬之黃家山焚掠該協守備陳安信
卽會同該縣陳春波等各帶兵勇四面圍攻分
投截剿賊驚竄狂奔其自相踐踏及被鎗礮擊
斃者二三百人生擒八名臣已飛飭該副將樊
繼祖帶兵往剿一面移知額勒登保福寧等如
帽子山果能蕆事卽將施南二帶竄匪先行掃
淨以期早紓

聖厯

同日梁肯堂奏言查吉林黑龍江兵丁間日一起接續前進

臣

委臬司全保於良鄉涿州一帶

藩司鄭製錦駐省分投照料其自省至正定以

南臣親自往來經理該兵丁等俱係壯年勇悍

在途極爲安靜茲最後之第十起黑龍江兵丁

已於九月初三日經署正定鎮總兵札勒杭阿

會同道府護送出磁州境交豫省派出大員迎
護前進再察哈爾馬匹係分八起行走沿途加
意餵養昨第八起馬匹於八月二十八日已過
正定日內即可全行出境均奏入

上命軍機大臣傳諭明亮額勒登保德楞泰福寧汪
新曰汪新奏施南地方又有賊匪滋擾雖經該撫
派令副將樊繼祖帶兵前往但兵力無多額勒登

保等於辦竣帽子山竄匪後自應就近移師往剿
至明亮德楞泰追剿均州竄匪賊人已至孫家灣
地方屯聚現在吉林黑龍江官兵卽日可抵襄陽
察哈爾馬匹亦可陸續到彼明亮等得此勁兵健
馬務當奮勇進攻剿淨賊匪勿稍遲緩再汪新摺
內所奏前在竹山竹谿殺賊傷亡之鄉勇等俱著
加恩從優卹賞